

YAMESI

Pepa Yamesi ingere panzi

kalo-tawana tamâta

Yamesi nde Yesu tai (Matai 13:55, Galesia 1:19), aku imo poe tamâta panzi kalo-tawana tamâta simo Jerusalem lawea (Pâri Tamâta 12:17, 21:17-18). Ingere ngua ñine ilâ panzi Juda tamâta ñinde kalonzi tawana Yesu Kirisi ñineŋga sikai nâna ñana, kala sikâwa pwapwataki silâ kala simo piti piti lâ tâno pinde. Yamesi itula ngua arara ñana vetâña pinde kindâ kalo-tawana tamâta ma tapaveta kuku. Iporo tu ambo nenda kalo-tawana ñandai igagati kindâ ñana taveta vetâña ara pinde ŋga, ande nenda kalo-tawana nde mao tia. Kindâ ma tapakatona kawânda ngua sondo ndo, ku ma tapatawa tininda ku takai nonja pa Maro Njalae.

¹ Naña Yamesi, naña amo Maro Kindeni kuku Yesu Kirisi rua nenzi wurâta tamâta. Naña angere ngua lâ pepa ñine tini imâ pa miki kalo-tawana tamâta lâ Isrel ŋgu sañaŋo kanaanomi rua, miki ñinde kala muŋga kapile nemi lawea tina, aku kalâ kamo pwapwataki lâ tâno pinde. Naña aporo kari ara pa miki rârâni.

Malia kie-kie uru isuka kindâ ñana tamandi kaika kâ

² Niŋgu-nambwe wukale, ambo malia kie-kie ma ipâŋga pa miki ñana ikai samâña pami, ande ara ñana miki ma kaporo ngua lâ warakami ilomi mine tu, “Naña ma andeka pâta.” ³ Miki kasama tu ambo vetâña tonje ma ipâŋga ñana ikai samâña

pa nemi kalo-tawana kâ, ande vetâñani ndaina isukami ñana kamandi kaika ku kakale malia ndia rârâni. ⁴ Aku ara ñana miki ma kamandi kaika mine nâ ku kakale nemi malia ikura zo rârâni. Ambo nemi kalo-tawana ma ikeno kaika mine ku imo nâ, ande miki ma kamo kalo-tawana tamâta sondo ndo, ikura Maro Kindeni ne pateâña mine, aku miki ma kakura ndo ñana kaponu muli papa i.

Ambo tamâta tonje iroto ñana ilo-kalo ara kâ, ande ara ñana i ma ikai noña pa Maro Kindeni nâ

⁵ Ambo tamâta tonje lâ miki ñginimi iroto ñana ilo-kalo ara kâ, ande ara ñana i ma ikai noña pa Maro Kindeni tu ma ilo-kalo ilua i. Ambo tamâta ñinde iveta mine, ande Maro Kindeni ma ipaloño pa i ne noña. Ñana tu Maro Kindeni uru kelekele arara kie-kie ilanzi tamâta rârâni, aku i ñandai tini pwâka ñananzi ku imbitanzi ñana nenzi noña nga. ⁶ Taitu ara ñana tamâta ñinde ma kalo tawana kaika muñga lâ nga, ñineña ikai noña pa Maro Kindeni. Ambo tu i ilo rua-rua kala iporo pa tamwata mine tu, “Tiambo Maro Kindeni ma ipaloño pa nanengu noña ku ilo-kalo ara ilua naña, tiya?”, ande ñgua kaña mine nde ara tia. Tamâta ea ilo rua-rua mine, ande i itogo tâi ne kâla ñinde lawea ikai kâki ku imbwa potomule mine. ⁷ Ambo tamâta mine itu Maro Ñalae ma sâ tonje ilua i, ande i ne ilo-kalo ñinde nde soki ndo, ⁸ ñana tu i nde tamâta ñana ilo rua-rua kâ. Mine kala i ne vetâña rârâni ikeno sondo tia ndo.

Yamesi itula ñgua panzi sugorai tamwatanzi wa kinzi mbaliña warakanzi wa

⁹ Ambo kalo-tawana tamâta tonje imo sugorai, i ne kelekele rârâ tia, ande ara ñana i ma indeka nâ, ñana tu Maro Kindeni isuka i kâki. ¹⁰ Ambo kalo-tawana tamâta tonje imo itogo mbaliña warika mine, ande ara ñana i ma indeka lâ zo ndia i ipânnga sugorai tamâta, ñana tu tamâta ea kinzi ilonzi ñalae koña tu sigona tâno ne mbaliña rârâ, ande kinzi ñinde nenzi via ma muli marumbu lâ, itogo unza ne mâle mine. ¹¹ Kinda tasama tu lâ zo ñana kari ikâki kâ, ande kari uru iveta nia nâna ndo, aku ikana unza ngâla-ngâla ndo lâ. Ñineñga unza ne mâle siyauru sindue, aku ne siñgâra ara marumbu ndo. Aku mine nâ, kinzi mbaliña warakanzi ma siveta nenzi wurâta lee, ñineñga walele nâ nenzi via ma marumbu lâ.

Maro Kindeni ilaņe kinda ñana taveta kiesaka kâ, ande tia ndo

¹² Tamâta ea uru imandi kaika ku ikale malia ikura zo rârâni, ande i ikura tu indeka. Ambo i ma ipole samâña ñinde rârâni, aku ne kalo-tawana imbe tia, ande Maro Kindeni ma via mao ilua i itogo ne kulu mine, aku ma imo ara mine ku imo nâ. Muñgani Maro Kindeni ipa ñgua tu ma via mao ilanzi tamâta rârâni ñinde ilonzi ndo keno pa i.

¹³ Ambo kelekele tonje ma igagati tamâta tonje ilo ku ilaņe i ñana iveta kiesaka kâ, ande i ma iporo mine tu, “Maro Kindeni ilaņe naña kala aveta kiesaka”, mine ndimo. Ñana tu kiesaka tonje ikura tu ilaņe Maro Kindeni tia ndo, aku Maro Kindeni ilaņenzi tamâta ñana siveta kiesaka kâ, ande tia ndo kanaņo. ¹⁴ Taitu kinda tamâta warakânda taitu-taitu ilonda uru igagati kinda ku

ilanje kinda nana taveta kiesaka kâ. Ilo-kalo sakamao uru iveta mona-mona pa kinda, aku ninde iveta ilonda kâki nana taveta kiesaka kâ. ¹⁵ Nininga ilo-kalo sakamao ninde ipulia kiesaka ipanga lâ ilonda kalonda, itogo taine ipagugua natu mine. Aku muli nga kiesaka ma itumbu njalae, ande ma ipagugua matenja lâ ilonda kalonda.

¹⁶ Ningu-nambwe wukale, nana ilongu ndo keno pami. Miki ma ilomi kalomi soki-soki ku kapalâne warakami ndimo. ¹⁷ Kelekele ara ndia kinda takai, ande Tamânda imo samba ilo io kelekele ninde ndoni indue imâ pa kinda. Inani munja ipulianzi samba ne sinâla ndoni, aku i ma ilele tamwata ne vetâna, ande tia. Kari uru ikâki ipane nia lee indue, ninga nia nana lâ; andeta Maro Kindeni ipalele mine tia ndo. ¹⁸ Nanayoni i ilo pateo tu ne ngua mao ma ipulia via ipanga lâ ilonda. I ilo tu kinda ma tamunga panzi tamâta ngu rârâni wa kelekele ndia rârâni i munja ipulianzi sipanga ninde, tatogo kâpwa wasaseki ipanga munjana lâ tâno ilo mwasina.

Ambo kinda tanânda nâ talonjo Maro Kindeni kawa ngua, ande ninde nde ara tia

¹⁹ Ningu-nambwe wukale, nana ilongu ndo keno pami. Miki kalomi ngere sonde nana nine kâ; ara nana miki rârâni taitu-taitu ma katambira tanami walele nâ nana kalonjo Maro Kindeni kawa ngua. Taitu miki ma kaporo katula ngua walele ndimo, aku ma wisimi nâna walele ndimo. ²⁰ Nana tu Maro Kindeni ilo tu kinda ma taveta vetâna ara lâ i nao, andeta kinda tamâta nenda wisi-nâna njandai isuka kinda nana taveta mine nga. ²¹ Mine nde ara

ņana miki ma kapile vetāņa ndia uru iveta ilomi muso, aku kapile vetāņa sakamao rārāni ņinde kala ipānga ņalae lâ tâno kulu. Ara ņana miki ma kapatawa warakami tinimi ku kapono muli sondo pa Maro Kindeni kawa ņgua, ņgua ņinde i uru io lâ ilomi kalomi. ņana tu ņgua ņinde ikura tu iyautemi piti lâ kondoma ilo ku via mao ilami.

²² Miki ma kalonjo Maro Kindeni kawa ņgua ņinde lâ tanjami nā ndimo. Ambo miki ma kalonjo kaa nā, ande miki ma kapalāņe warakami. Ara ņana miki ma kapaveta kuku ņgua ņinde ku koka muli. ²³ Ambo tamāta tonje ilonjo Maro Kindeni kawa ņgua, andeta ilonjo kaa nā kala ipaveta kuku tia, ande tamāta ņinde itogo tamāta imora tamwata nao lâ ndunju ilo. ²⁴ I imora tamwata nao lâ, ņinenņa iyoka ilā, aku walele nā i kalo kapa tu i nao kilala mana. ²⁵ Taitu Yesu Kirisi ne ņgua tukunja sondo ņinde imbware kiesaka ne kaika ku iveta kinda tamo soo nā. Mine kala tamāta ea uru kalo ņgere sondo ņana Maro Kindeni kawa ņgua ku ipaveta kuku, ambo i ma kalo kapa ņana tia, ande Maro Kindeni ne nzāmbe ma ikeno pa tamāta ņinde ne wurāta tava ne vetāņa rārāni.

²⁶ Ambo tamāta tonje ilo mine tu, “Naņa nde kalo-tawana tamāta ara”, andeta i ņandai ikatona tamwata kawa ņgua sondo ņga, ande tamāta ņinde ikai laņeņa pa tamwata, aku ne kalo-tawana nde kelekele kaa nā. ²⁷ Ambo tamāta tonje ne kalo-tawana ikeno sondo ndo lâ Maro Kindeni nao, ne soki tonje tia, ande tamāta ņinde ma uru iveta mine; i ma ilo ņananzi lālu mundoro wa kinzi taine mwala-mwala wa, ku ma isukanzi ņana nenzi malia kie-kie kâ. Andeta ņinde nā tia; i ma ipaka-

tona tamwata sondo tona, nana tâno njine ne vetâna potomule ma ikura tu iveta i ilo muso lâ Maro Kindeni nao, ande ma tia.

2

Ara nana kindi ma taveta vetâna kie taitu nâ panzi tamâta rârâni

¹ Ninju-nambwe wukale, Maro Kindeni kilala ipânga nia yo lâ nenda Maro Yesu Kirisi tini, aku nemi kalo-tawana ikeno pa i. Mine nde miki ma kaveta kemi ara panzi mbaliña warakanzi, anga kapu mulimi panzi sugorai tamwatanzi, mine ndimo. ² Ambo tamâta rua ma soka lombo simâ nemi luma nana pasauña kâ ilo nana sipanea Maro Kindeni kâ, aku tamâta tonje lâ kinzi rua ipasawa pasawaña ara ndo ku io singâra “gol” lâ mbau sili, anga tamâta tonje nde imo sugorai, ne pasawaña ara tia; ³ ambo miki ma kaveta kie ara papa tamâta njinde, i ne pasawaña ara, aku kano tu, “Noko kumâ kusaña sañonâña nia ara njine”, andeta miki ma kaveta mañeti pa sugorai tamâta njinde ku kapai tu, “Noko kulâ kumandi lâ nia njanje ndai”, tâku, “Kusaña tâno kulu lâ naña kenju tini laiti”; ⁴ ambo miki ma kaveta vetâna kie mine, ande njinde itogo miki kapateanzi tamâta simo piti-piti ikura warakami nâ nemi ilo-kalo soki-soki. Aku njinde itogo miki kapânga katogonzi ngua-samâña tamâta njinde simo tava ilo-kalo sakamao nâ.

⁵ Ninju-nambwe wukale, naña ilonju ndo keno pami. Miki kalonjo nga; Maro Kindeni ilo panzi tamâta ea simo sugorai lâ tâno tamâta naonzi, aku nanayoni ipatea tu nenzi kalo-tawana ma ipânga njalae ndo. Aku ipatea tu ma ikai maro panzi tona,

kala ma simo i ne ngu. Munḡani i ipa ḡgua tu ma ikai maro mine nâ panzi tamâta ea ilonzi ndo keno pa i. ⁶ Anḡa miki uru kaveta maḡeti panzi sugorai tamwatanzi. Opopo, kalomi ḡgere sondo ḡḡa; ea kinzi uru sitawa miki ndue ku sio malia kâki lâ kulumî, a? Aku ea kinzi uru sikaimi kalâ pa ḡgua nia, a? Kinzi mbaliḡa warakanzi nâ siveta kenzi mine pami! ⁷ Yesu Kirisi ḡa ikeno miki tinimi, andeta kinzi mbaliḡa warakanzi nâ uru siporo ḡgua pavaligiḡa pa Yesu ne ḡoa ara ḡinde.

⁸ Kinda nenda koipu ḡalae Maro Kindeni ne tukuḡa ikeno lâ pepa tini mine tu, “Noko ma tini mwasa panzi tini pinde itogo noko tini mwasa pa tamwata mine”. Ambo miki ma kapaveta kuku ḡgua tukuḡa ḡinde, ande ḡinde ma ara ndo. ⁹ Taitu miki kalonḡo ḡḡa; ambo miki ma kaveta kemi ara panzi mbaliḡa warakanzi, andeta ma kapu mulimi panzi sugorai tamwatanzi, ande miki kaveta kiesaka, aku ḡgua tukuḡa itula kilalami pwataki tu miki nde tamâta ḡana kapu ḡgua tukuḡa ututu. ¹⁰ Ambo tamâta tonḡe uru ipono muli pa ḡgua tukuḡa rârâni, andeta ipu ḡgua tukuḡa taitu nâ utu, ande ḡinde itogo ilaḡa ipole ḡgua tukuḡa rârâni. ¹¹ Kinda tasama tu Maro Kindeni itula tukuḡa tonḡe pwataki mine tu, “Noko ma kuveta sakamao kuku tamâta tonḡe kaiwa ndimo”. Aku ina kala itula tukuḡa tonḡe pwataki mine tu, “Noko ma kupu tamâta pâta imâte ndimo”. Mine kala, ambo noko kupono muli pa ḡgua tukuḡa ḡana pakâeḡa kâ, andeta kupu tamâta tonḡe pâta imâte, ande noko kupâḡḡa tamâta ḡana kulana kupole ḡgua tukuḡa kâ.

¹² Miki kalomi ḡgere sondo ḡana ḡine kâ; Yesu

Kirisi ne ŋgua tukuŋa ŋana tini-mwasa kâ imbware kiesaka ne kaika ku iveta kinda tamo soo nâ, aku Maro Kindeni ma ilea pa tukuŋa ndainani nâ lâ zo ŋinde kinda ma tamandi lâ i ne ŋgua nia. Mine nde ara ŋana miki ma kaporo wa kaveta ikura tukuŋa ŋinde kilala mine. ¹³ Ŋana tu lâ zo ŋana Maro Kindeni ma ipare nia panzi tamâta kâ, tamâta ea muŋga ŋandai kalo sukâŋa ŋananzi i tini pinde, ande Maro Kindeni ma kalo sukâŋa ŋana tamâta ŋinde, ande tia. Mâsi ŋana kalo-sukâŋa kâ nde ŋalae ndo, ipole pareŋa-nia ne mâsi.

Nenda vetâŋa itula nenda kalo-tawana kilala pwataki

¹⁴ Niŋgu-nambwe wukale, ambo tamâta tonje iporo tu, “Naŋa kalonŋu tawana Yesu Kirisi”, andeta i ŋandai iveta vetâŋa ara pinde ŋga, ande tamâta ŋinde ne kalo-tawana nde kelekele kaa nâ. Tiambo kalo-tawana kie mine ikura ŋana iyaute tamâta ŋinde piti lâ kondoma ilo ku via mao ilua i, tiya? Tia ndo! ¹⁵ Ambo kalo-tawana tamâta tonje i ne lalava ara tonje tia, aku i kâ kaniŋa kala keno tia, ¹⁶ ambo tamâta tonje lâ miki ŋginimi ipai tu, “Maro imo kuno! Noko kulâ, aku kupita lalava ara lâ tini wa kuka kaniŋa ŋana ma kapwa pupuro kâ”; ambo tamâta ŋinde ma iporo ŋgua kaŋa mine, andeta i tamwata tini pwâka ŋana isuka sugorai tamâta ŋinde ŋana lalava wa kâpwa wa, ande i ne ŋgua ma isuka tamâta ŋinde mâsi mana, a? Tia ndo! ¹⁷ Aku nenda kalo-tawana kilala kala ikeno mine nâ. Ambo tamâta tonje ne kalo-tawana ŋandai igagati i ŋana iveta vetâŋa ara pinde kâ, ande ŋinde itogo i ne kalo-tawana nde imâte lâ.

18 Tamâta pinde uru siporo pa nawalanzi tu, “Noko kalo tawana Maro Kindeni, anğa naņa uru aveta vetâņa ara pinde”. Taitu naņa ilonĝu tu atu ŋgua lâ kawanzi mine tu, “Ambo noko kalo tawana Maro Kindeni, andeta noko ŋandai uru kuveta vetâņa ara pinde, ande naņa ma akura tu asama noko ne kalo-tawana ŋinde kilala pwataki mâsi mana, a? Ambo taitu naņa warakâŋgu ma aveta vetâņa ara pinde, aku ŋine ma itula pwataki pa noko tu nanenĝu kalo tawana nde mao nâ. 19 Noko uru kutula ne kalo-tawana pwataki mine tu, ‘Maro Kindeni simbo nâ nde Maro mao’, aku ŋgua ŋinde nde ara ndo. Andeta kulonjo ŋga; kinzi koroani saka kala uru kalonzi tawana mine nâ, aku ŋine iveta kinzi siruru pâta kanaanjo!

20 Noko kulu kâmba tia ndo! Ambo noko ne kalo-tawana ŋandai igagatino ŋana kuveta vetâņa ara pinde kâ, ande noko ne kalo-tawana nde kelekele kaa nâ.” Kala ŋine naņa ma atula ŋgua ŋine ne duvi pwataki. 21 Munĝa, kinda timbunda Abraham io i natu Isaka kâki mira kulu ŋana ipu pâta imâte ku ilua Maro Kindeni itogo patarawâņa mine. Lâ zo ŋinde, Maro Kindeni ilo ara ndo ŋana Abraham ne kalo-tawana kâ, aku imora Abraham tu i tamâta ŋana ilo mbâra-mbâra kâ. 22 Miki kalomi ŋgere sondo ŋga. Abraham ne kalo-tawana nde ilâ taitu kuku i ne vetâņa, aku i ne vetâņa nde iveta ne kalo-tawana ipânĝa mao. 23 Mine kala Maro Kindeni kawa ŋgua ipânĝa kanaanjo. I ne ŋgua ikeno lâ pepa tini mine tu,

“Abraham io ne kalo-tawana ilâ pa Maro Kindeni, aku ŋana duvi ŋinde kâ ipânĝa ilo mbâra-mbâra lâ Maro Kindeni nao.”

Aku muli nga Maro Kindeni iporo ngua njana Abraham mine tu, “Abraham nde imo nanja ningunambwe.” ²⁴ Kala njine nga miki kasama tu kalotawana lanja ikura njana iveta tamata tonje ipanga ilo mbâra-mbâra lâ Maro Kindeni nao, ande tia. Kalo-tawana mao uru ipulia vetanja ara pinde, aku kalo-tawana kie mine nâ ikura njana iveta tamata ipanga ilo mbâra-mbâra lâ Maro Kindeni nao.

²⁵ Munja, nzâla taine tonje imo, i nja mine Rahap. Kinda timbunda Yosua ionzi zugu tamata rua soka paveanja nâ silâ pa Rahap ne lawea, njana sisama kazanja tamata njinde nenzi kaika, aku Rahap iveta kie ara panzi. Iveanzi lâ ne luma ilo lee, njine nja ionzi soka ara lâ nzâla tonje sinjenje njana kazanja kâ ku sitaulo kilo. Maro Kindeni imora Rahap ne vetanja ara njinde, ande kala iveta i ipanga ilo mbâra-mbâra lâ i nao. ²⁶ Kinda tasama tu ambo koroani ipile tamata tonje karae, ande tamata njinde nde imate lâ. Aku mine nâ, ambo tamata tonje ne kalotawana njandai igagati i njana iveta vetanja ara pinde, ande njinde itogo i ne kalo-tawana nde imate lâ.

3

Kinda ma tapakatona sondo njana kawânda ngua kâ

¹ Ningunambwe wukale, ambo tamata rârâ lâ miki njinimi situ sikai wurata njana sipanananzi tamata njana Maro Kindeni kawa ngua kâ, ande njinde ara kôja tia. Nanenju ngua njinde nde duvi mine; lâ zo njana kinda tamata rârâni ma tamandi lâ Maro Kindeni ne ngua nia, ande i ma io mata ilea kaika pa maka pananja tamata nema vetanja.

² Kinda rârâni taitu-taitu uru taveta vetâŋa potomule pinde. Andeta miki kalonjo ŋga; ambo kalotawana tamâta tonje ma iporo ŋgua ara nâ, ande tamâta mine ma imo tamâta sondo ndo, aku ma ikura ŋana ipakatona tamwata tini ndoni sondo.

³ Kinda uru tao “aini” mbuku pinde lâ hosi kawanzi ilo, ŋana iveta kinzi silâ ikura ilonda papa mine. Ambo takatona kinzi hosi kawanzi mine, ande kinda takura tu takai poe pa tininzi ndoni.

⁴ Aku miki kalomi ŋgere ŋana wâŋga ŋalaŋala nenzi vetâŋa kê tava. Wâŋga nde kelekele ŋalae tina, aku lawea uru iyoka more-more ŋalae ku izuzuŋa wâŋga ikâwa tâi kulu ilâ. Anja wâŋga ne poe nde kelekele kiri-mwata nâ. Andeta kalomi ŋgere ŋana ŋine kê; ambo wâŋga warika itambulilia poe kiri-mwata ŋinde, ande wâŋga ma nao sori lâ, ku ma ilâ papa nia ndia wâŋga warika itu ilâ papa. ⁵ Aku mine nâ, kinda kawânda nde karaenda ne pinde-pinde kiri-mwata nâ. Taitu i uru ipasuka tamwata tini kêki ndo. Aku kalomi ŋgere ŋana yââ tona. Yââ tini-mwata nâ ikura tu igagati yââ ŋalae tina ku ikananzi kêi rârâni lâ dugu ilo. ⁶ Aku kinda kawânda kala itogo yââ mwasina. I nde karaenda ne pinde-pinde taitu nâ, ambo taitu i uru ipulia vetâŋa sakamao kie-kie rârâ. I uru iveta karaenda ndoni ipâŋga muso, aku iveta nenda vetâŋa ndoni ipâŋga soki-soki, itogo yââ ikana kelekele ndoni mine. Aku yââ ŋinde nde iyoka pa yââ ŋalae ne mbââ ilo kala imâ kawânda ilo.

⁷ Kinda tamâta takura ŋana takai poe panzi simbi ŋgoi kie-kie, kinzi sii wa mwâta wa kelekele rârâni uru simo tâi ilo wa. Mao nâ, kinda taveta kinzi simbi ŋgoi rârâni simo kalonda marumbu

lâ. ⁸ Taitu tamâta tonje ikura nana ikai poe sondo pa tamwata kawa, ande tia ndo. Ikura zo rârâni, kinda kawânda pakâe ku taporo ngua sakamao. Kinda kawânda nde itogo mwâta saka mwasina, aku ninde itogo kawânda ikura nana ipu tamâta pâta imâte.

⁹ Kinda kawânda taporo ngua pinde nana tapanea nenda Maro Njalae kâ, ina kinda Tamânda. Andeta taporo ngua sakamao pinde nana tayaulanzi tamâta kâ tona, kinzi ninde Maro Kindeni munja io tamwata kilala lâ tininzi.

¹⁰ Kinda kawânda nde kekekele taitu nâ, andeta ngua kaŋa rua uru ipânga lâ kawânda ilo. Paneâna ne ngua uru ipagema kuku ngua sakamao. Ningunambwe wukale, vetâna mine nde ara tia ndo.

¹¹ Lââ ara ne keve tonje ikura tu ipulia tâi tava, ande tia. ¹² Ningunambwe wukale, kâi mbimu ikura nana ipulia nâto kano, ande tia, anja kâi wâwâe ikura nana ipulia mbimu kano, ande tia. Aku mine nâ, tâi ikura nana ipulia lââ ara kâ, ande tia. Mine nde mana mana nja kinda kawânda uru iporo ngua kaŋa rua, a?

Ambo tamâta tonje ne ilo-kalo nde sondo, ande i ma iveta vetâna ara

¹³ Ambo tamâta tonje imo miki nginimi tava ilokalo sondo, ande i ne vetâna rârâni ma itula ne ilokalo ninde pwataki. I ma ipatawa tamwata tini ku ma ipono muli pa vetâna ara, itogo i ne ilokalo sondo kilala mine. ¹⁴ Anja tamâta ea uru ipadâda nanzani tamâta pinde, aku imo iroto nzâla nana ipasuka tamwata tini kâ, ande tamâta mine ma indeka ku iporo tu, “Nanenju ilo-kalo nde ara

nâ”, mine ndimo. Ngua kaŋa mine nde ŋgua lanjeŋa nâ. ¹⁵ Ilo-kalo kie mine ŋandai iyoka pa samba indue imâ ŋga. Njinde nde tâno nâ ne ilo-kalo, aku njinde nde ilo-kalo potomule lâ Maro Kindeni nao. Sadana nde imo ilo-kalo kie mine warika. ¹⁶ Miki kalonjo ŋga; tamâta ea kinzi uru sipadâda ŋananzi tamâta pinde, aku simo siroto nzâla ŋana sipasuka warakanzi tininzi kâ, ande tamâta njinde silaŋa sipole ŋgua tukuŋa, aku uru siveta vetâŋa potomule kie-kie rârâni tona.

¹⁷ Anŋa ilo-kalo ara iyoka pa samba indue imâ, aku ilo-kalo njinde nde kie tonje. Tamâta ea kinzi sikai ilo-kalo njinde, kinzi njinde ma siveta vetâŋa sondo lâ Maro Kindeni nao. Kinzi ma simo ilonzi kalonzi taitu kunzi tininzi pinde, ku ma naonzi mwasa nâ panzi. Kinzi ma sipatawa warakanzi tininzi, ku ma kalonzi sukâŋa ndo ŋananzi tininzi pinde. Kinzi ma siveta vetâŋa ara kie-kie, ku ma siveta vetâŋa kie taituni panzi mbaliŋa warakanzi wa kinzi sugorai tamwatanzi wa. Kinzi nenzi vetâŋa ma irerege kuku kawanzi ŋgua. ¹⁸ Ambo wisi-pisi ne mâsi ma imo ŋgininda, ande njinde itogo kinda tapau kaniŋa vâsa lâ tâno ilo. Aku muli, njinenŋa vetâŋa arara kie-kie ma ipâŋga lâ ŋgininda, itogo kâpwa ara ipâŋga tâno ilo mine.

4

Tamâta ea ipono muli pa tâno ne vetâŋa, ande i imo Maro Kindeni ne kazâŋa tamâta

¹ Pambitâŋa tava pawanŋa rârâ uru ipâŋga lâ miki ŋginimi. Aku njinde nde duvi mana, a? Njinde miki kasama lâ. Miki uru ilomi kâki ŋana kagona

mbaliŋa kie-kie, aku ŋinde iveta paraŋa ipâŋga lâ ilomi kalomi.

² Miki ilomi ŋalae koŋa tu kagona mbaliŋa kie-kie, andeta miki ŋandai kakai ŋga. Mine kala miki uru kapunzi tamâta pâta simâte. Miki ilomi yosi pa mbaliŋa, taitu miki kakai, ande tia. Mine kala miki uru kapawa sakamao ndo wa kaveta paraŋa wa. Miki ŋandai kano pa Maro Kindeni tu ma mbaliŋa ilami ŋga, aku ŋana duvi ŋinde kê, ande miki kakai mbaliŋa ŋinde tia. ³ Aku lâ zo ŋana miki kakai noŋa pa Maro Kindeni tu i ma mbaliŋa ilami, ande miki kakai tia, ŋana tu nemi ilo-kalo nde soki-soki. Miki ilomi tu kakai mbaliŋa ŋana kandeka ku katambira kaa nâ, aku kalomi kapa ŋana Maro Kindeni kê.

⁴ Miki nde katogo taine tonŋe ipile kaiwa tamâne ku ilâ itambira tini potomule! Miki kalonjo ŋga; ambo tamâta tonŋe ilo pa tâno ŋine ne vetâŋa wa kelekele wa, ande ikai kazâŋa pa Maro Kindeni. Tiambo miki kazizâla ŋana ŋinde kê, a? Tamâta ea ilo tu iveta mete kuku tâno ŋine ne vetâŋa, ande i imo Maro Kindeni ne kazâŋa tamâta. ⁵ Maro Kindeni kawa ŋgua ikeno lâ pepa tini, aku ŋgua ŋinde itula pwataki tu i io Koroani Sapâŋa imâ ilonda lâ, aku Maro Kindeni ilo ŋalae tu kinda ma tao ilonda ndo ilâ papa i simbo nâ. Tiambo miki katu ŋgua ŋine nde ŋgua kaa nâ, a? ⁶ Taitu Maro Kindeni ne wisi-wisi nde imâ ŋalae ndo pa kinda. Mine kala i kawa ŋgua ikeno lâ pepa tini mine tu, “Tamâta ea kinzi uru sipasuka warakanzi nâ tininzi, ande Maro Kindeni ikai kazâŋa panzi; anŋa i ne wisi-wisi ikeno panzi tamâta ea uru sipatawa warakanzi tininzi.”

⁷ Mine nde ara ŋana miki ma kapatawa warakami tinimi lâ Maro Kindeni nao, aku kapaveta kuku i kawa ŋgua. Ambo miki ma kakai kazâŋa pa Sadana, ande i ma ipilemi ku ikâwa ilâ. ⁸ Ambo miki ma kalâ kamo Maro Kindeni tini laiti, ande i kala ma imâ imo ku miki mine nâ. Miki kiesaka tamwatami, ara ŋana miki ma kapaveta kuku vetâŋa ara nâ, itogo tamâta ipua mbau ŋana ipâŋga tini mbâra-mbâra kâ. Aku miki tamâta ea kamo tava ilomi kalomi rua-rua nâ, ande ara ŋana miki ma kasoki ilo-kalo sakamao ikeno ilomi ŋinde piti, ŋana ilomi ma ipâŋga mbâra-mbâra kâ. ⁹ Ara ŋana miki ma kalomi ŋgere ŋana nemi vetâŋa soki kâ, aku kalomi sukâŋa wa ilomi malia wa kata ŋalae wa. Miki tamâta ea uru kandeka ŋana nemi vetâŋa soki kâ, ande ara ŋana miki ma kapalele ku kamo tava ilomi malia ndo. ¹⁰ Ambo miki ma kapatawa warakami tinimi lâ Maro Ŋalae nao, ande i ma isuka miki kâki.

Kinda ma tasowe ŋgua sakamao ilâ panzi kalo-tawana tamâta ndimo

¹¹ Niŋgu-nambwe wukale, miki ma kaporo ŋgua sakamao ilâ panzi ninda-nambwe kalo-tawana tamâta ndimo. Tamâta ea isowe ŋgua sakamao ilâ pa ninambwe kalo-tawana tamâta wa italea i wa, ande ŋinde itogo tamâta ŋinde italea ku iporo ŋgua sakamao pa Maro Kindeni ne tukuŋa tona. Aku lâ zo ndia noko kutalea tukuŋa ŋinde, ande noko kupu muli papa marumbu lâ, aku kupamorai tu noko nde ŋalae kala kupole tukuŋa. ¹² Taitu Maro Kindeni simbo nâ ipulia ŋgua tukuŋa, aku i simbo nâ ma ipare nia panzi tamâta. I simbo nâ ikura ŋana iyautenzi tamâta ku via mao ilanzi, aku i

simbo nâ ikura ñana izavarunzi kâ. Mine kala noko nde ea kala kutu kutalea ñgua ilâ panzi noko tini pinde, a?

Kinda ma tapasuka warakânda tininda ndimo

¹³ Miki tamâta pinde uru kaporo ñgua mine; “Tiambo ñainani tâku mbwale tâku, ande naña ma ayoka alâ pa lawea tonje, aku ma akai wurâta ñana mbaliña kâ ikura mbwera taitu.” Ayo, noko tamâta ea uru kuporo ñgua kaña mine, ande ku-
lonjo ñga; ¹⁴ Noko ñandai kusama ñana vetâña ndia ma ipâña lâ mbwale kâ. Noko ne via nde itogo mundo ipâña ku imo zo tini nâ, ñineña walele nâ marumbu ndo, aku nao tia lâ. ¹⁵ Mine nde ara ñana noko ma kuporo ñgua kaña mine; “Ambo Maro Ñalae ma isâu pa naña, ande naña ma amo viângu, ku ma aveta wurâta ñinde ilonju tu aveta.” ¹⁶ Andeta miki uru kapasuka warakami tinimi. Miki kapandekâna warakami, andeta kalomi kapa ndo ñana Maro Kindeni kâ. Aku vetâña rârâni kie mine nde vetâña sakamao ndo. ¹⁷ Miki rârâni taitu-taitu kalomi ñgere sonde ñga; ambo Maro Kindeni itula vetâña ara tonje pa noko tu kuveta, andeta noko ñandai kuveta vetâña ñinde ñga, ande ñinde nde kiesaka.

5

Ñgua kaika ilâ panzi mbaliña warakanzi

¹ Kala ñine naña atu aporo ñgua pinde pa miki mbaliña warakami. Malia ñalañala kie-kie nde nao laiti ñana ipâña pami kâ. Mine nde ara ñana miki ma kakai kalo-kalo ku kata ñalae.

² Miki nemi mbaliŋa wa kelekele rârâni nde nao tia lâ, aku nzirika sika nemi lalava arara rârâni marumbu lâ. ³ Miki nemi “gol” wa “silva” wa, ande take kana lâ. Aku lâ zo ŋana Maro Kindeni ma ipare nia panzi tamâta kâ, ande take kana ŋinde ma itula nemi kiesaka ipâŋga nia yo, aku ma ikana miki karaemi itogo yââ mine. Zo imâ ipâŋga laiti lâ ŋana tâno ŋine ne zo ma marumbu kâ, taitu miki kamo kagona mbaliŋa nâ. ⁴ Miki kalomi ŋgere sondo ŋga; muŋga, tamâta pinde sikai wurâta pami lâ nemi tâno ilo, andeta miki kakai lanenja panzi ku katoto nenzi mbumbu pinde. Aku mbumbu ndainani nâ nde isarâwa pa Maro Kindeni tu ma ipare nia pami ŋana nemi vetâŋa sakamao ŋinde kâ. Aku nemi wurâta tamâta ŋinde nenzi sarawâŋa kala ipâŋga pa Maro Ŋalae, i Walo Tamwata, aku ilonjo lâ. ⁵ Ikura zo rârâni miki kamo tâno kulu, ande miki uru kakai mbaliŋa arara kie-kie, kala kamo kandeka nâ. Miki uru kaka kâpwa ŋalae, kala katumbu ŋalajala lâ. Mine nde miki katogo ŋgoa itumbu ŋalae, ŋinenŋa tamâta sipu pâta imâte. ⁶ Miki uru kaonzi tamâta arara lâ ŋgua nia, ŋinenŋa kapunzi pâta simâte. Andeta kinzi ŋandai miki nemi kazâŋa tamâta ŋga.

Ara ŋana kindi ma tatu ilonda keno mwasa ŋana takale malia kâ

⁷ Mine nde niŋgu-nambwe wukale, ara ŋana miki ma katu ilomi keno mwasa ŋana kakale malia kâ, aku kao tinimi pa Maro Ŋalae ne zo ŋana itaulo imâ kilo kâ. Kalomi ŋgere ŋana ŋine kâ: kindi uru tao tininda ŋana kâpwa ara tu ipâŋga lâ tâno ilo, aku tatu ilonda keno mwasa ku tao tininda pa

karâzi tu ma isuka tâno. ⁸ Aku ara ñana miki kala ma katu ilomi keno mwasa mine nâ ñana kakale malia kê. Aku kamandi kaika nâ, ñana tu Maro Ñalae ne zo ñana itaulo imâ kilo kê ande imâ ipânga laiti lâ. ⁹ Niŋgu-nambwe wukale, miki ma wisimi nâna panzi ninda-nambwe kalo-tawana tamâta ku kaporo ŋgua nao-muli panzi, mine ndimo. Tia ma Maro Kindeni io miki lâ i ne ŋgua nia ñana ipare nia pami. Miki kalonjo ŋga; tini nâ ŋga Ŋgua-Samâña Tamwata ñinde ma imâ ipânga.

¹⁰ Niŋgu-nambwe wukale, ara ñana miki ma kalomi ŋgere ñananzi ŋgua-tulâña tamâta muŋgâña, kinzi ñinde muŋga situla Maro Ñalae kawa ŋgua. Lâ zo ñinde, nenzi kazâña tamâta uru siveta kenzi sakamao ndo panzi, andeta kinzi situ ilonzi keno mwasa aku sikale malia ñinde. Ara ñana miki kala ma kaveta ikura nenzi vetâña mine. ¹¹ Kinda uru taporo ŋgua mine; “Tamâta ea kinzi situ ilonzi keno mwasa ñana sikale malia kê, ande kinzi ñinde sikura ñana sindeka kê”. Aku miki kalonjo Jop parina lâ tu i itu ilo keno mwasa ku ikale malia kie-kie ipânga papa i ñinde. Aku miki kasama tu muli, ande Maro Ñalae iveta kie ara ndo pa Jop. Mao nâ, Maro Ñalae kalo sukâña ndo pa kinda, aku i nao mwasa nâ pa kinda.

Kinda ma tasarâwa pa sâ tonje ñana isuka kinda nenda ŋgua pâña, mine ndimo

¹² Niŋgu-nambwe wukale, nanenŋu ŋgua ñine nde ñalae tina; miki ma kasarâwa pa samba wa tâno wa kekeleke tonje ñana isuka nemi ŋgua pâña, mine ndimo. Ambo miki kapambwâre ñana kaveta vetâña tonje, ande ara, kaveta ikura warakami

kawami mine. Ambo miki ma kaporo tu, “Nan̄a ma aveta vet̄an̄a n̄inde tia”, ande ara, kaveta ikura warakami kawami mine. Ambo miki ma kasar̄awa pa s̄a ton̄ge tu isuka nemi n̄gua, ande Maro Kindeni ma iomi lâ i ne n̄gua nia.

Maro Kindeni uru ipaloŋo pa tamâta ara nenzi noŋa

¹³ Ambo malia ip̄an̄ga pa tamâta ton̄ge lâ miki n̄ginimi, ande ara n̄ana tamâta n̄inde ma ikai noŋa pa Maro Kindeni n̄ana isuka i k̄a. Ambo tamâta ton̄ge ilo ndeka, ande ara n̄ana i ma iw̄an̄gi w̄an̄giŋa panēan̄a k̄a pa Maro Kindeni. ¹⁴ Ambo tamâta ton̄ge lâ miki n̄ginimi ikai pukon̄a, ande ara n̄ana i ma ipasupwa il̄a panzi kalo-tawana tamâta n̄gu nenzi katon̄an̄a tu ma sim̄a kuku. N̄inen̄ga kinzi ma sino pa Maro N̄alae, ku ma sikai i ndamwa ku siyoli samimi lâ pukon̄a tamâta n̄inde tini. ¹⁵ Ambo nenzi kalo-tawana ikeno mao pa Maro Kindeni, kala sikai noŋa mine papa i, ande Maro N̄alae ma izavaru pukon̄a n̄inde piti lâ tamâta n̄inde tini, aku ma tini ara kilo. Ambo tamâta n̄inde muŋga iveta kiesaka, ande Maro N̄alae ma izavaru kiesaka n̄inde piti lâ i tini tona. ¹⁶ Mine nde ara n̄ana miki kalo-tawana tamâta taitu-taitu ma kapatula nemi kiesaka pa nawalami, aku kano pa Maro Kindeni tu ma isukami. Ambo miki ma kaveta mine, ande Maro Kindeni ma ivetami tinimi ara kilo. Ambo tamâta ton̄ge imo tamâta sondo lâ Maro Kindeni nao, aku ikai noŋa papa, ande Maro Kindeni ma ipaloŋo pa tamâta n̄inde ne noŋa. Kinzi tamâta mine nenzi noŋa ma sikai kanoŋo.

¹⁷ N̄gua-tul̄an̄a tamâta muŋḡan̄a Ilia, ande i tamâta n̄a, itogo kinda mine. Andeta i ino kaika

pa Maro Kindeni tu ma isae nzâla pa karâzi nana indue imâ tia kâ. Ninennga karâzi imbe indue tâno kulu tia ndo lee, ikura mbwera nato anga nzimona lima kanaŋo taitu lâ. ¹⁸ Aku muli, ninennga ikai nonja kilo, aku karâzi imbe indue, kala kâpwa ipânnga tâno ilo kilo.

Ambo tamâta tonje iveta kiesaka, ande ara nana kindi ma takai i taulo pa nzâla ara kilo

¹⁹ Ningi-nambwe wukale, ambo tamâta tonje lâ miki nginimi ipu muli pa Maro Kindeni ne ngua mao ku ilâ iveta kiesaka, ninennga i ninambwe tonje ikai i taulo imâ pa nzâla ara kilo, ande ninambwe ninde iveta kie ara ndo papa i. ²⁰ Miki kalomi ngere sondu nana nina kâ; ambo tamâta tonje itu ipono muli pa kiesaka, andeta ninambwe tonje isuka i nana ipile nzâla sakamao ninde, kala itaulo imâ pa Maro Kindeni kilo, ande ninde itogo i ninambwe ninde ikai tamâta ninde piti lâ nzâla ninde ilâ pa matera kâ. Aku Maro Kindeni ma izavaru i ne kiesaka piti lâ i tini tona.

MARO KINDENI KAWA NGUA
The New Testament and Psalms in the Sio Language of
Papua New Guinea
Nupela Testamen long tokples Sio long Niugini

copyright © 1995 Wycliffe Bible Translators, Inc.

Language: Sio

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-08

PDF generated using Haiola and XeLaTeX on 11 Nov 2022 from source files dated 9 Oct 2020

21a9f7d3-4b3e-512c-ab21-eb25ed7aef4f